

I PASSI...

Pathri, ca sî ntê cela...

... ri nzòccu mi ricisti  
'ntra i filari virdhi ri pàmmini  
- cciù vvirdhi l'anni – gn'juornu r'april  
anziemi ...circannu ciantimi  
picca paroli mi scrissi ntê rrica rô cori  
rô to labbru cimidhi aruci  
simenza ri l'uocci rê manu  
e ancora ogghi i miei passi  
sicùtunu appriessu ê to pieri  
comu tannu  
supr'â to ùmm'ra cciù llonca  
turnannu ri sira  
agghiri ô suli rrusu menthri cala

E mmaju ... e gghiuggnu...prestu l'ardhuri  
ri l'armu rô cori  
i culura...rrussu...ggjallu...rê rrosi rê spichi  
bbiniriciennu nta-ll'òstia rô pani  
r'ogni gn'juornu u to nnomu, siminaturi.  
E austu  
e ssittiem'ru... ppi-mmia cap'î mmiernu  
ancora ùmm'ra - ancora passi  
pàmmini sicchi - cinnirini ntô fuossu - risiusi ri làcrimi ri cielu  
ppi-ttia - fora rô calantàriu - luci - nta jòla r'aternu - l'ali

Si rici: fuorsi 'n-numani si torna  
àuthri terri? àuthri gghienti?  
I culura armenu putissi... stissa ùmm'ra e ll'arma  
e a mamòria  
ar'aspittari  
tàcità 'ntisa - rrinconthrariti - pinziriusu - ddhu filidhu ri fumu  
'm-muzzicuni ri sicaru ntô labbru  
ùnicu sfizziu  
e ll'uocci, pathri, i to manu ràpiri  
ancora simenza – 'nthra i jta luonchi - ruppa - rani ri rrusàriu.

Turnassi jnnaru  
ancora aprili  
e rê cimidhi - ora fraschi -  
i to paroli: “ **tu ora cerca ntê libbra** “ - ora scritti ntê ciàji ri l'arma  
vutatu a la Luci - finarmenti - grazie!